



秣陵集序



余束髮與黎中秘游蓋習嶺南歐先生楨伯詩是時楨伯送諸生百頌以稱詩聞余後偕計上公車楨伯以明經推擇入燕習其人因益習其詩也亡何余以不售太常去楨伯亦隨牒之廣陵之汝南不聞問者數年所矣又後予持橐金馬門而楨伯以慈恤再起遷國博又遷廷評日從都市

交驩是時楨伯詩益工名亦日益起鬱然
海內宗匠矣又後余謁告南歸楨伯又遷
工部尚書郎而南則相與講藝秣陵纒々
無間也會楨伯倦游且移疏乞休新安吳
孟白廣陵陸無從次其秣陵諸詩刻焉徵
余言揭諸首簡余述所以雅游於楨伯者
如此而併為之叙曰夫秣陵據有江山之
勝不啻崑澠河華明興為

高皇帝故都則商亳周鎬遐躅攸存負壯
游而稱厯覽者徃々結轍于道其固然哉
况當綦隆之際履好文之朝薦紳先生得
以優閒省闈枕藉圖書作者響臻彬彬乎
盛矣楨伯學務博綜而詩尤專詣一時秉
槩名家多所跂附今觀其集睇景紓懷即
事導興或於宮庭廬衛而登紀錄或於僊
臺梵宇而述宴游或以訪古而寄慨或以

傳御而眷心或占綴于酬知或湛思于掩
閣清裁駿發牘映篇流所為瑰其志而肆
其端者蓋得江山之勝非尠矣古今聞人
有經遊題品者後咸引之為重即以楨伯
詩貽諸將來其不為秣陵重哉昔唐杜工
部子美游驛長安而杜陵韋曲諸篇直與
川原草木爭勝千載而下猶然頌之楨伯
与子美同擅寸名同稱工部同以游驛倡
和篇章為都邑增重然子美遭天寶之亂
轉徙河西劍南崎嶇以從行在何其不偶
也今

天子登又右賢而楨伯廻翔禁署播雅頌
之元聲以襄潤鴻業子美所遇殆過之
矣抑予又聞世之譚詩者類謂吳下以色
澤勝中原以風骨勝其沿習使然也楨伯
崛起百粵而詩業寔闕蓋兼有其勝能以

粵之詩與吳之詩中原之詩三不鼎立斯
 亦豪哉則非獨為秣陵重抑亦為粵重也
 夫秣陵重粵重而楨伯之詩益重矣
 萬曆癸未仲冬朔日秣陵余孟麟誤

秣陵集

目錄

卷一

五言古詩 十八首

卷二

七言古詩 十七首

卷三

五言律詩 一百五首

卷四

五言排律 十一首

卷五

五言絕句 二十一首

卷六

七言律詩 一百三十九首

卷七

七言排律 二首

卷八

七言絕句 八十首

秣陵集卷之一

嶺南歐大任楨伯甫著

五言古詩

出都門作 二首

玉河湯湯流白日冉冉度今晨驅我車脚躡卽岐
路言念骯髒人敢有纓綵慕 主聖實優容班行
媿非據跌宕漢公卿能垂特達顧游好眷失羣貴
靡忘徒步貽之黃父言送我青門馭綢繆鄴中宴
哽咽河梁賦碣石日迢遙浮雲悵馳騫行者不可

留申章寄情愫

倚彼汶上篁移植來薊丘嶧陽孤生桐托根河中
洲何異巖巒姿一顧蒙恩庥風雲幸值遇七載瞻
宸旒日趨金馬門亦點銅龍樓霄漢翔以翔改秩
陪京游俶裝辭密親分鑣盼良儔別促思方始一
日誠三秋南曹孰云遠淺薄固所憂豈不戀禁闥
宣力寧易酬黽勉就長路夷猶戒鳴騶君其惠前
綏慰我行悠悠

驚雷篇

并引

萬曆辛巳七月七日舟行江上遇雨泊瓜
步雷擊舟檣櫂夫驚恐余謂雷天威也物
適值之然不敢不敬也既夕省過遂成斯
篇

昊天時疾威積風殆先兆陰陽適相薄蒼鬱怒而
慄我舟次江介迅雷擊檣杪豐隆破響來列缺飛
光剽隱隱尚填填霆奮更火燎駭氣从奔激倏閃
遠羅曜斯須七箸失顧盼篙師叱世異景公臺變
似夷伯廟休咎我方省善否天所照震鄰已切躬

察痾蚤求療在莒能無忘居鄒懼難肖夕惕敕戒
勤勵德永思劬

貞烈篇 并引

陳君長源爲閩中丞公之仲子而林氏則
潘伯公女也陳君聘未婚而歿林女請奔
喪請事舅姑俱不遂竟絕粒嘔血死事具
林宗伯福州志中余讀中丞公所爲墻記
悲焉嗟嗟身不再聘從一而終可以風矣
爰製斯篇以告史氏

東治鍾靈粹三山閔幽貞女出林氏門禮訓自性
成蚤受聘于陳待年猶未行夫倏苕榮凋女敢愛
其生總帷不可望繫絲空復情羅靜豈慕烈翟素
寧希名穀也莫共室窆可同隄城從容求吾志一
歿冰霜明宴娛竝雲蓋姚裔飛霓旌春蘭更秋菊
終古歌懷清

縈河篇

岷山導江水發自天漢上源浚流以長嘉陵渺相
望飛湍漫漭來雲氣紛沆碭灌入馮夷潮時湧江

妃漲赤岸汎霞津白沙積霜障練淨朝以披縠鮮
書還蕩縈迴巴子曲猛銳巴渝唱隱君潔者流下
簾丈人行遺榮早蜚遜遠志謝禽向亭臯俯潺湲
衿情日夷曠上善鏡空明至文渙溶漾適軸一何
幽老易素所尚樂泌已永年擊波有遺榜漣漪猶
至今荇藻莫可狀其中方圓折珠玉光摩盪毓祥
井絡西千齡燭星象

秋夜直省中

華省傍畫垣閤門夾朱戶縱橫太弩署廻薄公車
府自爲含香吏宿直臥周廡徂宵秋已深莎雞振
其股墜露芳蕙凋驚颺散蓬聚肅穆仰皇居蕭寥
視天宇幸茲際休明授餐過升黼豈不畏簡書敢
云薄簪組考父示益恭旦夕惟僂偃陳力卽未疲
尸位曾何補馳思白雲中矯望臯禽羽

雪夜懷張幼于

茲夜一何長勁颺起平楚別君征虜亭望君新林
浦同雲被鍾陵密雪塗江滸蘭卮不共持瑤琴待
誰撫緘情詒所思因之問蘅杜

答顧司勳

二首

宸居鉅麗觀建業維舊京省寺夾闔闔宮闕槩泰
清人文盛斯日鳴環獵冠纓顧生起吳會握管逢
休明修嬖宛珠潤清馥含蘭馨通方極丘索辨古
分淄澠詩從四始正曲合九奏成何哉銓衡地洵
有箕穎情結佩豈不美折麻殊自榮余豈茂陵客
跌宕東方生申章謝嘉藻輾轉懷同聲

黃虞曠千載尼泗陳歌詩弦詠響乍息風雅道已
衰延州觀樂來曹鄴無所譏明音始復古熙豫固
有期及子邁妮好携手升玉墀趨蹌會禁闥位序
連班司援琴寫中曲進禮杼妙辭慙我蒹葭質暎
彼璠璵姿有斐惟古歡繾綣自一時嘉會不可常
蓬華吾將歸子其勉令德所思在皇闈

答吳秀才拾之

濬發吳楚間奕奕一髦士讀多袁豹書代守班家
史敷文蔚霞燦持論倏颺起白馬夾車轂青雲擁
冠履就我秣陵西檀橋暫停軌美哲玉照鮮馨言
蕙吹似昔聞沐雪賦今得過江汜援毫惠雅篇釀

忝薦新醜獎挹非所膺麗澤能毋鄙秉禮大姬宗
歷聘延陵子桑陰日未移儻來問樗里

卓漱父崧齋

潛虬起重雲祥鷁集樛木寄此玄暢懷高齋引遙
矚君從嘉邈年考卜塘西曲平原轟介丘修林帶
陶牧煙途綿邈升露井岵嶢築江楹瞰海門越倚
出天目窓虛納疎颺於焉送煩燠步欄一徙倚新
篁晝鳴玉家猶董相園耕似鄭公谷多暇削竹勤
已奏三千牘白虎講異同匪但榮丹轂絃以碩人

詩爲君詠邁軸

象教精舍詩

并序

南昌有精舍曰象教蓋王元美以古灰佛
像寄朱孔陽謂西僧吐三昧火自焚其徒
擣骨作爲灰佛孔陽虔斯室以奉之詒書
索詠敬此寄題

泥洹那竭國阿耨王舍城寶界極四照瑟居懸三
明何年丈六身圖畫來漢京竺僧荼毘日金骨灰
佛成居士豫章人家續南宗燈六塵忘有相十喻

歸空名一室似招提雨積花林平遙峰矗牕牖鳴
溜飛階庭茂植祇園樹馴鴿棲不驚理亦講解析
念能禪寂澄知幻非所幻有生自無生君其戒淨
土毋忘弇州情

吳公擇齋中同道行允兆成叔分賦得陶淵

明

徵君百代士稍出經世務夙敦詩書好匪爲弦歌
故束帶何可羈漉巾自真趣嗜酒藍輿還不廢虎
溪步吾廬在南村五柳扶疎樹江州白衣至把菊
日未暮歸去來山中宇宙同一寓懷哉古田舍義

皇樂貞素

答孫伯遠

送美臨南浦回首新亭游我自嗟繫匏君如遠行
輶蔣陵有高岫大江日長流鯉魚何處來南從白
蘋洲故人尺素書念我情綢繆還復折疎麻一寄
航門秋嘉會難可期五嶺行悠悠葭菼隨風翻搖
落增離憂努力事修名報子雙吳釣

送吳允兆

浩浩長江流爍爍衆星密行人不可留轉盼已相
失舳艫戒征帆波濤乍漉汨以我南還人送子東
歸日臨水泝離觴斯須猶促邾默默情若含悽悽
戀何及菰城路伊邇西候歸潮急河梁憶携手引
望空佇立

吳孝甫黃山草堂

宗炳旅衡岳謝客游匡山西已隃荆巫南欲窺松
門寄托遠氛雜登陟窮攀援動操琴亦響披榛屐
恒穿通隱事不同心惟寄噴岼吳生沉冥士遺榮
微尚存犢鼻何不有壚異臨邛罇桔槔雖自持灌
非山陽園井竈久欲卜枌榆猶未殘家近軒韓宅
浮丘丹液寒三十六峰前草堂築高原綠篠蒼雪
磴清泉白雲壇賁豈待束帛遯也宜丘樊儻遺鸞
鳳音長嘯將飛翻

登幕府山

岷源西南導東北歸海門天吳海風平白沙漾成
湍瑯琊渡江來安東睨中原一代臨沂生永嘉逢
險艱茲山幕府開王氣何鬱盤丹旭迎羽葆頽霞

薄旌竿襟帶畫形勝組練魚麗陳威儀春禊日鼓
吹前茅還顧賀拜道左吳會士駿奔荆揚雖晏謚
新亭歎河山仲父號夷吾滄波驃騎屯臨津鞠軍
旅甲弩填丘樊至今波不揚霸業奚足言將軍盛
揖客登壇盡衣冠灑洒千秋人悠悠望長安

王行甫阻風新林浦待吳明卿不至遣詩相

報輒申酬荅

方舟遠行邁命旅將何之姑蘇別所欽秣陵以爲
期客路忽改月涉江悵睽離汀葭夕已靡沙鷁晨
仍饑淮南春尚寒崩騰號驚颶蘆岸不可沂迴艫
纜洲倚烟中極千里南北悲渺瀾游吳謝東楫歌
郢弦南詩行子念故人一寄風波辭跬步吾阻隔
伏枕空淒其石尤會吾意榜柁酬相思

秣陵卷之一終

秣陵集卷之二

嶺南歐大任楨伯甫著

七言古詩

酬王敬美解官後以秦中碑刻關洛紀游見寄

綠髮朱顏王敬美家學東吳一才子七經教授如
司馬四方掌志爲外史都講三鱣從此升解官竟
爾還鄉里始爲長安寄薄游鄜州西去更延州軒
轅石傍橋陵過姜女祠看峽水流思洛轉能尋白

馬出關誰得駐青牛却愛三花登二室便從七月
發扁舟諸篇紀勝廣聞見拂衣殆歷中原遍孟嘉
何用從事郎張翰蚤謝東曹掾絲竹惟知近自然
尊鱸聊且適吾願筐篚不入舴艫中三秦碑版歸
裝半故人別君已二稔散局辦官猶拾藩君知嗜
古癖未除兼兩相遺盡霞錦蟲書頗解辨金戈鴻
寶故難私玉枕青谿署裏吏事少時以一編供晝
寢移來免寄北山文舊刻新題卷帙分襲之和氏
連城璧畧以郇公五朶雲講肆此時多馬隊墨池
何日有鵝羣他年儻就逍遙論解帶披襟一共君

秦淮臥雪齋

晉家東府城臨流萬竿竹雪深騎尉居今在秦淮
曲淮邊夾水柵爲塘朱雀門前舊有航數椽劉瓛
先生宅寧似蕭蕭臥雪堂

湘中曲

雲中君雲中君九疑猶隔萬山雲曲中欲寄千行
淚澧浦沅江誰得聞

零陵香零陵香露濕羅襦結帶長采采前溪歡不

見爲郎扶楫下瀟湘

金陵曲

三山二水帝王州南朝昔日愛風流朱扉畫棟鴛
鴦殿綺翼雕甍翡翠樓槃上金燈停白鶴壺中銅
箭咽蒼虬薰鑪蘇合頰移座羽帳流蘇半上鈎嬋
娟夜向牕前度傾城二八留人住一曲能歌揚叛
兒誰家更有莫瓊樹碧玉何年始破瓜可惜風光
蕩子家不差並命嬌春鳥願作同心照日花點黛
圖黃紛旖旎寒芳拾翠鬪繁華桃葉豈堪留幾月
竹枝聞已下三巴惟有采桑南陌裏使君五馬車
曾止夫壻東方千騎歸君看日暮紅塵起

江中桂楫曲

千里飛流通楚煙三津濁浪引巴川西南揚子源
何極一望瀰漫桂楫前羊角飈馳吹驟雨魚鱗雲
起合遙天遠見青龍浮浦上乍疑白馬戲濤邊檣
動相風鳥竝轉纜移立堠鷺齊牽孤樹蒼茫難辨
影驚湍蕩漾不成圓何處榜人歌扣柂更逢津吏
醉持船扁遇軻裘知賈客髻梳倭墮學江僊漁童

晝自催鳴鼓姹女時能工數錢底事狂夫書不到
別離經歲又經年

淮南小隱歌贈陳徵君

君家舊在無諸國白頭來作江東客衣裘久已厭
奔走道路何嘗聞擁隔一身自許漁樵羣有子况
是文章伯拄杖欲投煙霧深支茅獨剪雲霞落秦
淮流水柵塘斜百尺松梯雪浪花誰云鍾阜周顛
宅不似烏衣謝尚家君不見天津橋南築糟丘何
如金陵城西之酒樓丹詔玄纁雖有名且留江上

白蘋洲

黃山引贈鄭子陽

黃山之高四千仞崑哉岌哉呼吸上與青天近三
十六峯連斗牛巨靈夔夔東南鎮軒轅昔日乘蒼
虬浮丘容成曾共游鳥書蟲篆不可見琅玕芝草
空能留瀑飛百道霄漢下水晶簾掛雙龍湫五色
恍有金銀闕僊乎一去三千秋鄭君僊才古風格
幼學丹青工水墨師山之後大雅人梁園老作諸
侯客家近焦村百里間天梯雪石尚堪攀藥爐丹

鼎軒轅宅摘得松花可駐顏借問鄭君何日隱虎
頭巖下縛柴關上餐天都半夜之沈瀝下弄石橋
千折之潺湲洞中之人把瑤草玉書招爾黃鵠還
我有芙蓉三尺劔贈之歸來兮崑丘蓬海之僊山
相逢行送李山人君實游吳越

獨客从臥薊門雪君先旅服游瀛渤相逢可醉金
陵月君已扁舟泛吳越從來交契無後先誰爲詞
華問工拙秋風颯颯不可留江上蒲萄酒初潑吳
越稱詩待俊人只今開府有詞臣投刺能容禰處

士買山幾住郗嘉賓君才跋扈幽燕北揮毫磊落
見風格篇裏言言金石聲篋中卷卷煙霞色一時
把袂誼最深三月裹糧興何極倏然鼓擢出新林
不及張燈永今夕青山回首石頭城鴈蕩天台柱
杖行儻因西笑懷千古便待東歸賦二京

贈長干心上人

心公祝髮松樹前素菴法主衣鉢傳拈花一笑授
持从曾是靈山會有緣是法西來世何極白日本
暉暉流水長瀟瀟我自真心奚勞向人覓般若

光明證虛寂摩尼珠現鄣東色

孫楚酒樓歌

有引

按孫楚字子荆太原中都人少藻卓絕爽邁不羣少欲隱居年四十始叅鎮東軍事後至馮翊太守負材不羈相傳其酒樓在金陵湮沒已久明萬曆壬午秋新安王寅從白下張維聞國初魚鱗冊莫愁湖畔有酒樓遺址欣然尋之邀余作歌余觀金陵自晉以來南朝故蹟往往名存而某水某止蒼茫莫辨是作也因二子憶子荆殆亦淵明記桃花源之意云

五山不可到十岳竟未游清狂誰如二子者崎嶇歷落毋所求不從朝歌理尚平之杖笠却來金陵尋孫楚之酒樓我聞英絢之姿是孫楚誰容漱石而枕流征西司馬官不薄扶風記室交未酬典午山河日分割酒樓人已名荒丘山東才子愛明月裏巾更著紫綺裘石頭城下沽美酒吳姬扶醉秦女謳澄江淨練望吳越此事便足三千秋只今王

郎張郎亦詞伯訪古好奇挾圖冊城西鼓擢女兒
湖醉覓子荆舊榛棘玉笋空歌零雨篇繡衣不見
迎船客噫吁噉百尺之樓何處無君其問之李太
白

雪中青谿館梅花盛開夜觀王山人良材所
遺畫梅障子贈以長句

金陵城中五日雪千里瓊瑤遍吳越荒齋小閣耿
疎燈竹榻紙窓似明月起看窗外青谿濱玉艷珠
霏朶朶新兩京麴塵十年宅誰能移此羅浮春延

平山人王仲子昨朝遇我長干市鐵榦縱橫冰
絲僊葩亂灑桑皮紙窓前畫障窓外花一時併在
省郎家詩無水部當年句興落溪翁半夜槎我將
南問嶺頭驛君亦東歸劔津客記得揚州官閣詩
寫寄閩山玉華色

海上三山行爲唐仁卿父母雙壽賦

君不見見南北漲渤一水通扶桑萬里初日紅蓬萊
瀛洲與方丈黃金宮闕雲氣中三神之山可望不
可至船行往往引以風澄海東近扶桑東霞冠星

佩唐僊翁陳姥秀筭六珈貴重封偕老顏如童華
堂結構開耆壽煙波縮帶滄津口鸞歌鳳舞軒轅
丘包甌菁茅雲夢藪錯衡文轂擁路衢峩弁振纓
向庭牖雕盤繽紛翠釜馳金支閃爍珠旗走翁姥
齊歡此日觴象筵歲酌長生酒僊郎計部萊衣斑
蘭滿階墀玉樹環安期巨棗紛將獻王母蟠桃近
可攀君不見阜鄉亭下赤舄還千歲求我蓬萊間
且向天中覲雙闕還來海上訪三山

西園席上贈毘陵譚士朱懷南

一飲一石疑淳于乍談乍諷似方朔不須送客獨
相留朱生言言盡諧謔忻逢紀在秣陵西白浪尊
前瓦官閣

臯鶴篇

有引

司空尚書省中有一鶴三至予署廳引吭
長鳴昂藏欲飛示以輕舉之狀予感其意
爰賦斯篇

秣陵一夜商飈起散露凝霜萬餘里九臯有鳥號
胎禽日盼嶺雲睨江水憶從羽翮長韞縢十載廻

翔紫禁來曾陪朱鷺聽僊樂幾逐銅烏繞帝臺丹
砂頂愛江頭浴白雪翎羈省中宿戀闕雖馳北望
心思鄉每奏南飛曲踉蹌遼海路罪微何須人識
是令威浮丘縱接崧高去緱氏臨霞不似歸歸去
今有雙翼四百峯前阿耨池三千年後軒轅石秋
月兮嬋娟秋風兮翩躚君不行兮何遲吾將期汝
朱明耀真之洞天

臥佛臺歌爲張計部君簡賦

并序

臺在濱州築于宋太平興國二年易爲民

居已从今歸于張氏計部君別業所標勝
者也因爲短歌以續林君朝介之作

渤海城中臺百尺臥佛佛牙紀幽蹟麗譙前聳古
郡名滌池半帶滄波色東望茅焦有隱居西臨千
木舊精廬省郎起家地官氏藏寄臺中萬卷書臺
邊翠栢手所種槐陰滿庭護雲栢花開紅杏席茵
游蔭借蒼藤張幙擁我行住岳泰岱中觀濤亦過
溟渤東辟疆名園更栽竹拄杖將尋張長公

賦得天都峯贈高徽州

廬山詩集
秣陵卷之二
九
黃山秀拔青冥中天都之峯何穹窿高居特室羣
真集玉佩珊珊度碧空嶙峋直上三千丈星辰可
躡日可望風落鈞天帝時前瀑飛積雪神臯上名
山雄鎮胡爲哉明牧應求濟世才華陰京兆徵恢
出石室成都待朕開濟陽高君豈其胤麟符作守
新安郡五馬紆臨紫氣遙尺書召入甘泉近君不
見容成氏浮丘公行隨絳節軒轅宮 聖主明堂
朝列辟豈勞旌馭過崆峒
秣陵卷之二終

秣陵集卷之三

嶺南歐大任楨伯甫著

五言律詩

張羽王自楚中寄題蘧園適聞其藩相之報

次韻慰答 二首

下雉械書到荒園待結鄰餘皇荆自棄章甫越偏
親我愧謀生計君今失路人厭聞裾可曳丘壑實
藏身

知爾愁驅馬何人遣牧羊歸仍張薦竹產乏葛家

桑小苑驕梁客雄風答楚王千秋君自愛赤管似
差強

張秋病中遣悶

舟航便臥疾衾枕屢曾移鼓柁謀多拙彈冠老自
疑東臯三歲賦西署幾篇詩儻乞殘生去躬耕尚
未遲

邳州遇周比部子仁北上

波聲流不息何意遇君時橋指留侯碣河通漂母
祠雙旌看北轉孤棹向南移握手他鄉別彤雲寄

所思

下邳尋圯橋授書處

黃石書何在斯人竟不還門低濁河樹家遠穀城
山百戰寧虞楚孤軍蚤入關空悲泗亭水日夜自
潺湲

清江浦酬許虞部伯漸

京洛曾相問才名似昔賢慙勞漕艦使舊督水衡
錢淮月頻吹笛河煙一扣舷慚予新病後携手是
何年

送俞公臨遊楚

風急臨滄觀勞勞送客頻鄂花吹笛侶江月刺船
人倚相今名楚安期不入秦著書君好在何處臥
荆榛

次韻答姚伯子京口見寄

沿牒趨南署尋盟憶大淮琴尊勞爾待丘壑寄吾
懷樹引雲陽郭江通海岳齋應能憐曼倩金馬尚
詆諧

答金在衡問病因懷伯子

老去故人少書來問負痾伏生經可授姚合律如
何京口黃花酒江頭白髮歌相將一携手高閣望
滄波

送何光祿判永州

零陵千里路君擁白門騶旗引監州客帷寒別乘
侯三湘開嶽館百粵遶江樓爲政先風詠翩然紫
蓋秋

經冶城憶亡友盛仲交

蒼潤軒猶故斯人不可招如何西序客老作大城

國朝詩集 卷之三
樵書帶秋零落牀琴夜寂寥一編封禪草誰奏
聖明朝

挽陳子野

秋早聞君病吾來哭蓋棺垂綸江雨急邀笛閣雲
寒階下蘭先悴屏間竹未殘不知何事業人作太
丘看

送黃比部翰伯擢守廣南

鼓吹臨江發王程去莫攀驛傳丹鳳詔馬度碧雞
山夔客爭供稅碓門不用關中原開府地飛旆幾

時還

寄胡秀才智卿

汝兄向予道力學識君賢散帙青山下持經絳帳
前鯤鵬今已徙騏驥不須鞭喜得通家弟風雲正
少年

承恩寺訪楊維五何惟聖不遇

時蜡月八日

尋君臘八會不遇竟空還落葉一燈下寒雲雙樹
間深棲知淨理強出媿清班納祿吾猶晚惟應學
閉關

花朝對雪黃白仲蘇子仁倡和見寄因用其韻

快雪未共賞小齋空自看雲沈桃葉渡玉照竹皮冠
酤酒晚亦醉勒花春更寒山陰人不至何以報琅玕

送倪公甫渡河訪朱子得

訪舊寧辭遠春深濁浪低衣裳修武北風雨太行西
郡閣吟紅藥山家杖赤藜天壇君若到欲寄白雲題

寄朱懷慶

豈謂長安別飄蓬各遠哉君方懷魏闕予亦下燕臺
河內褰帷過江東鼓枻來秋鴻應早度好寄八行裁

春日同張侍御伯大衛比部君大登龍廣山亭限韻

春晴一以眺亭子足清歡風日當佳麗山河此鬱盤
城分吳苑色花送晉宮寒不是霜威促何能半醉看

金處士姚鴻臚邀同許奉常雨中飲飛霞閣
地迥高霞入城孤宿雨沉萬家春樹密一逕晚花
深頌酒頻招賞游僊偶息心欣逢鸞鶴侶何異在
山林

誦黃定父陸元德過江相訪

別君經十年爲我問江船羸馬銅街雨新鶯紫禁
煙披襟留竹下理詠向尊前雙漿毋催去春波正
可憐

送張侍御伯大赴闕

勞勞亭下別北上值春風搏海莊生鳥還都鮑氏
驄雲霄今最近詞賦獨稱雄封事江淮計君行奏
法宮

送胡繕部明卿考績赴京

立馬秣陵觴金隄柳萬行奏勞看水部封事認臺
郎鞭弭風雲上冠簪日月旁繞朝還有策春色在
明光

寄朱孔炎宗侯

十載河間學三雍奏玉除篋餘前代草閣有秘方

書隱几冠仍籜清齋食是蔬西園最相憶飛蓋更
何如

送袁仲思還閩應舉

君自汝南裔家多閩越書青箱修世業赤管待公
車海月帆光裏江花鏡彩餘游邛還建節人識馬
相如

送李比部廷實守興化

烏石推名郡儒風大海隅行應持鵠印恩已賜麟
符子荔紅雲島侯梅白雪湖看君飛蓋日詞客待

操觚

哭李駕部歸櫬

共惜輿司馬都人聚哭號天心何殄瘁王事竟疲
勞丹旄城邊雨青舫海上濤錢唐歸葬日風木正
蕭騷

送顧君實遊南雍還上海

槐市傳經去東歸不可留繡襦明月佩金埒少年
游海燕迎鄉路江花照客舟子雲憐父黨相憶白
門樓

有方齋為許徵君作

出告遊非遠耕鋤十畝餘承顏思問寢食力命巾
車陶令餅惟粟班生賜有書羨君歡綵服蘭玉更
誰如

夢歸

應世吾何翫誰令未拂衣三江雙桂楫五嶺一荆
扉羈紲名為辱蹉跎夢每歸豈因灌園日始息漢
陰機

王元美聞予轉虞部見寄

一首

爾宅金庭近樓居夏亦涼智鋒禪宿障慧炬照迷
方桂父賁禺外茅君句曲旁山虞應可笑豈是漢
馮郎

遊僊勞遠夢招隱寄操觚壇下毛公石帆前范蠡
湖學將叅小品書未著潛夫黃鵠空相望翩翩肯
載無

送沈秉忠還錢唐

時大司馬銅梁張公奉
敕便宜行事一日弭兵民

之變杭
城晏然

君去問桑梓驩逢兵氣銷月從天竺寺秋入海門

國虞部集 秘陽卷之三
潮酒舫歌迎客漁家醉答樵秣陵游可憶倘得似
南朝

送衛比部君大守溫州

握得麟符去誰知請郡情漁樵歌五袴郊遂望雙
旌白雨江心寺青楓斗口城瑯琊王內史猶重永
嘉名

送馮孝廉咸父北上

斗酒青谿曲君行謁玉除家傳緱氏學年少洛陽
書御宿春飛騎承明夜直廬他時看建節何但漢

相如

周鴻臚汝礪李太僕孝甫王孝廉永叔過谿

上

留客秋偏暑江東艇未行煙霞頻矚日蘭芷一交
情醉問賢人酒歌殘子夜聲五君誰更詠且傍竹
林名

答錢功父

建業孤舟路維揚幾歲書長鞭愁策馬尺素問烹
魚曲奏吳趨市玄留蜀客廬秋風苦蕭瑟隱几興

何如

吳駕部公擇齋中同臧晉叔錢仲美二博士

翫菊

興來吾不淺問菊進杯盤分得朱門色移從粉署
看金枝燈並照玉艷雪爭寒欲奏山薌曲秋風向

上蘭

同周文美游宗振集顧司勳宅張幼于適至

得來字

清夜僊曹約華筵竹下開周顥携客至張翰狎盟

來雅共三觴飲歌逢九詠才劇憐乘興遠忻賞更

徘徊

同方鴻臚張太學集許太常宅限賦堂字

風流建業盛耆德甲江鄉賓客仍碁墅煙霞似射
堂字從楊子問酒愛次公狂騶騎何勞促寒宵玉
漏長

張太學幼于劉大理長欽顧司勳道行胡孝

廉元瑞枉集徐氏東園遲李臨淮惟寅不

至共賦心字 二首

江東詞客至高會主家林鵲起中原日鴻冥異代
心竝驅皆上駟照座半南金厭次今方朔為郎尚
陸沈

賜園名杜曲邀客到山陰絃管歌中合魚龍席下
吟石曾驅海至谿似入江深驃騎難同賞空馳徑
寸心

山亭再餞伯大同幼于道行用唐人韻

白門一相送斗酒緩君行密樹霜初落離亭月漸
生山通巴子國驛過錦官城立馬空凝望寒江浪

正平

同顧司勳張太學蘇陸二山人夜集吳駕部

齋中得蒸字

知有酒如澠西來興可乘歌能嘲飯顆醉不答肴
蒸霜送高城析星搖小院燈江東度陸後誰得和
松陵

雨後黃都水道登李司封于田邀同張太學

幼于飲徐氏東園限門字

林竹過秋繁雨聲宵更喧酒能携石井車自問籬

門礪曲前朝寺谿深太傅園
拔留勞秉燭頻得奉清言

除夕和顧司勳

天涯驚節序鶴髮日偏長
寓直金陵歲思歸粉署
郎辛盤歡舊俗濁酒醉他鄉
鼓吹江南曲春來滿建章

雪中送吳拾之還金谿

客裏驚分袂詞人正少年
游稱吳季子詩似謝臨川
落鴈帆檣側溪江雨雪前
雲林歸有賦早寄林

陵船

送尤計部被播暫歸閩中

行色候春星閩峰九疊青
省蘭初入握江草已揚舲
書笑中山篋關迎醉尉亭
主恩今不淺趣召在宸扃

送卓長習還杭州

業成槐市日鼓篋豈云勞
去泛三江棹歸看八月濤
季長猶賦頌仲蔚且蓬蒿
漢室需才急秋風起鳳毛

聞朱評事可大自汝州量移崇德

昔送滎陽去今看樵李來除書何日下遷客未須
哀署裏郎官舊關東任俠才白門江鴈過思爾數
登臺

送來僉憲濟時赴西粵備兵梧州

爲郎同舍久冠豸羨君行塞上遙開嶺牂牁曲抱
城請纓趨府客吹笛下江兵甌駱勞招諭千秋漢
使名

上已陳右父金道存聶道亨何惟聖吳載伯

黃伯仲過集得歌字

青谿修禊事尊酒興偏多宅近陳中令人猶晉永
和積蘇初似樹鳴鳥半成歌留客無絲竹君能不
厭過

問夏繩卿病

尊生知有道猶遣問寒溫司馬常稱疾東方更避
諠荆榛蒼石几芝朮白雲園君向醫王學清涼自
不煩

暮春姚唯之鄔汝翼方康侯李季宣陳季廸

諸子見過屬芍藥初開

青谿拂石處紅藥試花時
愛客歡方劇開罇醉不
辭謝郎華省直白傳禮曹詩
誰似閑如我從君倒
接羅

夏夜同劉廷尉吳駕部顧司勳集李司封宅
鍾嶺臨高閣雙桐夏亦寒
邀歡樽是桂並署握皆
蘭賦借文犀管酣欵紫籜冠
夜深留客久星漢一
盤桓

讀何孝婦殷傳

負汲心非苦齊眉食但貧
誰知嘔血日獨有割
人礪月照青竹江風吹白蘋
他年陳俎豆思與孟
家鄰

爲劉屯部悼吳季子

郎君東國彥家學似丁寬
雨急折蒼玉霜清彫紫
蘭修文何自早遺札不能看
獨有秋風壘山窓夜
夜寒

送杜子庸入都

吳鈞新結束薜荔帶堪裁
書勞嚴樂上賦待馬卿

來聞闔曉方闢筮篋秋莫哀更逢推轂日漢主最
憐才

同省中諸郎遊莫愁湖登樓上

酒樓不可問舟子載琵琶殘黛諸隄柳遺鈿五浦
花一裘非李白雙槩似盧家湖倚郎官賦寧勞異
代誇

初秋吳幼安余宗漢閔壽卿陳守禮郝謙亨
程孺文黃白仲梅季豹集青谿館汪象初
祁羨仲不至得干字

客過漫郎宅依然不似官榿林通崦曲茅屋傍陀
干白雪芙蓉渠酒秋風首宿盤兩生期未至猶作孟
公看

送閔壽卿汪象初讀書金山寺

許詢都講去浮玉白波南海客求碑到江僧寫偈
叅匡牀開竹苑亂帙寄花龕米汁曾無禁山觚半
夜談

送葛士隆還通州省覲

征虜亭前艇脚躡送客歸青持藏篋簡斑照上堂

衣江北帆初卷淮南葉共飛海霞開館日莫斷孟
家機

秋夜同范比部介儒集方鴻臚允治署中得

京高二字

衙齋涼露色誰道在陪京山近城烏起籬疎澗鹿
行青鐙寒卷幔玉漏促飛觥二紀看交態談深此
夕情

把酒何驩洽中原得二豪晉家方僕射漢日范功
曹而我思鱸膾逢人問蟹螯江東今夜月偏照鼎

門高

子及返自滇中而予將歸嶺外感今敘昔情

見乎辭

滄海十年期鍾山今在茲賜環君始返捐袂我將
辭客傲亦自適吏廉而可爲欲求千古士別去謝
班司

題徐朝直課子圖

學已推文苑兒今更寧馨壁藏濟南簡家授廣川
經夜誦鐙常碧晨趨佩自青豫章名父子奎斗煥

江星

夏文甫將游五嶽別於江東

夏統藥囊在向平藜杖隨溪逢三笑客岳待五游
詩濟勝看能事深棲媿夙期掛冠神武去終欲寄
茅茨

秋日雨中同方允治集范介儒書齋同賦霞

倫二字

招携非夙約雨宴法曹家厨出雙樽酒園滋五色
瓜潮溝添急溜林苑入飛霞沾濕銀鞍遠向論過

浣花

誰道山王會猶能及伯倫閉關聊翫世結社欲棲
真蕭爽齋中帙沈冥竹下賓他宵如聽雨應憶倦
游人

寄顧元瘡評事

京洛頻相訊才名顧長康官稱廷尉府閣直秘書
郎槐影夾城近漏聲雙闕長因君勞遠夢秋思滿

江鄉

大有山房爲天台黃生賦

洞關空明上千秋委羽時鳴鴻飛欲隱控鶴去難
期舊業儒林傳名家祖德詩誰知巖石臥姓字動
京師

陸無從崔子玉梅季豹見過

幽期曾不遠策蹇傍溪行豈亦陳留郡能尋阮步
兵鳴琴怡逸興濁酒寄浮生落落南朝客焉知世
上情

送陸纂父歸洞庭山中

去問漁樵路東歸過太湖刺猶題處士書自著潛
夫麈尾談賓少魚腸借客無橘林今正熟千樹給
秋租

木末亭送孫叔達還吳門

秋興吳中去津人暫繫舫菊花園客酒貝葉竹僧
亭問路江浮碧看山海湧青未論丘壑勝清世且
沈冥

送方伯書省覲還莆田

千里寧親舍雲霄爾不羣歸舟風欲落別路鴈初
聞嘯共蓬池客書投滄海君青箱推世業去有薦

雄文

送周公化游楚

勞勞頻送遠城下俯江流夜雨三山渡秋風七澤游
酒邊堪顧曲賦裏似登樓欲問尊鱸去吳門待
客舟

俞公臨卜居陽羨有年矣余聞其幽適輒寄

二詩

遯世荆南去芳鄰德豈孤藥畦黃蘗澗漁侶白鷗
湖兩舫携芒屨三騶對酒壚知君工筆札論可著

潛大

洞壑應非遠移家杖笠携井猶王粲宅山似戴顓
棲田父求綿上詩人愛灑西他時新水長吾欲問
鳧鷖

贈邵南仲

隱操存閭史賢聲重國琛獨憐堂背樹摧折百年
心躍鯉生難致眠牛夢可尋東山能內舉蘭玉謝
家林

秋日宋西寧忠父黃孝廉白仲李山人次公

携酒過訪得秋字

十日布衣飲西能問酒樓長楸三騎過短劍五陵
游投効吾何晚懷歸不易求馬卿方病渴猶臥漢
園秋

酬彭虎少自全椒過江見訪

浦口帆初下相尋到大航攝衣花蘖外把酒藥鑪
旁龍劍星星躍驪珠字字光仲宣書籍富應不待
中郎

邵長孺自吳門過別因寄無過虞仲

談君十年事猶是馬相如科斗題周記瓠盧餉漢
書歸停青雀舫去問白牛車舊好應能憶朱明有
敝廬

訊少廉孟白無從公臨校書寶光寺

校籍開龍藏誰將馬隊看筆牀猶傍暖書帶未應
殘居士元金粟諸生尚鷓冠石經何日就江左似
長安

梅禹金見訪青谿

宣城何自至建業始能尋數問勞修翮相逢結片

國虞部集 秋陽卷之三
心梅花寒氣早楓葉暮江深欲把朱絃理聽君白
雪音

答宋忠父黃白仲雪中飲擊筑齋見懷

誰道梁園客偏能寄所思
翼初飛藥籞霰已積書
帷引筑歌相和盈觴醉共持
自憐深閉戶猶似洛陽時

同朱倉部次夔携酒過唐民部仁卿宅得花
字

夾轂問君家疑從杜曲斜
御河街裏酒宮閣雪中

花攞炬喧饑馬城笳急
暝鴉嚮來論去住吾意卻
平瓜

除前二日同陳山人爾瞻集方銀臺允治齋
中得儒字

逢君蒼玉佩封奏漢庭趨
台斗榮新秩江湖剩老
儒春聲官署鶴雪色禁城
烏有客金錢會何勞問
酒壚

送劉計部克和何起部師召考績同舟北上
兩省推賢最三年入帝鄉
俶裝輕道路理詠共

國朝詩集 卷之三
舟航鳳闕烟光紫
鷓班曙色蒼
漢家逢盛事
同日奏長揚

寄吳縣傅明府伯俊

茂宰蘇臺日
詞人歷下生
才名馳上國
問訊過陪京
卜夕移花宴
行春帶雨耕
思君題一札
遙寄闔閭城

雨中李惟寅宋忠甫邀集馮虛閣同吳公擇方子及諸君得游字

沾濕銀鞍去
行從小隊游
苑花迷塔寺
江靄薄城

樓館似雷居士園
稱沈隱侯開尊仍此地
百代更風流

千雉雞山側
丹梯到上頭
石能縈細蔓
閣自俯長楸
淨土高僧社
清時大雅游
雨深春草綠
猶自足淹留

寄方山人景武時從戚大將軍在嶺外

薊門傳尺素
白下久相聞
學似陳書記
行隨霍冠軍
嶺雲朱鷺曲
江雨白鷗羣
秋晚吾將去
扶藜一問君

酬王堯載過訪見貽

詞客淮陰至江頭把臂遲枚乘工作賦薛漢雅言
詩鞭弭猶相及簪裾未可期疎麻雖欲贈何以報
瓊枝

王堯載周渭陽薛世和沈孟威枉集

一逕莓苔滑開關聽馬嘶齋頭散平楚城曲帶荒
谿過雨蔬能剪微醺酒屢携蕭蕭曼容宅應記白
門西

方子及李于田邀陪吳明卿同陸無從方仲

美集天界寺屬驟雨過得山宇

載酒因詞伯相携蕭寺閑雲來常滿閣雨急欲沈
山淨土蓮花後新林竹樹間誰令許玄度扶策夜
溪還

聞譚侍御子誠述衡岳之勝輒欲游矚

玉衡開勝域金策寄靈蹤鄧郁何年隱劉蚪幾日
逢霞光飄紫蓋霽色上芙蓉聽得昇真訣松梯九
萬重

誠意伯劉國禎招飲同鄭光祿趙舍人集

宗稷勳臣舊君稱文武才簪巾羊祜出筆札谷雲
來芝曲從人問松醪爲客開交游餘二紀重上秣
陵臺

寄田子藝

鳳乎千古士君但漢田郎老作申州客官猶博士
堂陪游行橐筆起草入含香戢羽吾將去分飛媿
鴈行

寄何子啓山人

青鳥來三島金庭近五湖游仙携綠玉飯客具彫
胡世業能編竹閒身欲據梧綵衣君自樂繞膝更
雙珠

湯義仍至聞丁右武已次揚州時鄒爾瞻蒞
比部三月矣予將歸嶺外留贈三君子

江東文物盛千古足吾徒豈必周司樂何傷楚大
夫鵠雖憐遠客馬自識長途欲待羣賢賦秋風已
憶鱸

太博曾封事都官尚諍辭風霜千字挾江漢九歌
遺但可袁絲飲寧知賈傅悲扁舟吾引去何以寄

相思

何仲雅訪予普德寺

逢君邂逅日山裏律僧家名士歸平叔徵君識若
耶牕蘿懸似帶巖桂鬱將花淨土寧勞約恒河一
聚沙

寄丁元父

鱗羽不相及姓名先已聞烟波鄂渚客并牧海陽
君浮筏牽江水開牕過岳雲便應青瑣謁能憶白
鷗羣

程